

08 MAY 2001

UMNO KENANG JASA VETERAN SEMPENA ULANGTAHUN PENUBUHANNYA

KUALA LUMPUR, 8 Mei (Bernama) -- Jasa veteran Umno akan menjadi tumpuan pada sambutan ulangtahun ke-55 penubuhan parti itu di Dewan Merdeka, Pusat Dagangan Dunia Putra di sini, Jumaat ini.

Pengerusi Tetap Umno Tan Sri Sulaiman Ninam Shah berharap para veteran Umno yang sihat dapat hadir pada majlis itu yang turut memperingati perjuangan Umno dalam usaha memerdekakan negara dan mendaulatkan bangsa Melayu.

"Kehadiran para veteran amat bermakna kepada parti," kata Sulaiman yang juga pengerusi majlis sambutan.

Beliau menjangka seramai 3,500 orang akan hadir pada majlis sambutan itu yang terbahagi kepada dua sesi, katanya dalam satu kenyataan.

Sesi pertama yang diadakan pada sebelah pagi adalah khusus untuk para veteran, bekas anggota-anggota Dewan Undangan Negeri dan bekas anggota Parlimen.

Sesi petang pula akan dihadiri oleh Presiden parti Datuk Seri Dr Mahathir Mohamad, anggota-anggota Majlis Tertinggi, ketua-ketua bahagian dan cawangan, anggota persatuan bekas wakil rakyat, anggota veteran, Pemuda, Wanita dan Puteri Umno.

"Pada sesi ini juga akan diadakan dialog antara Presiden dan wakil veteran," kata Sulaiman.

-- BERNAMA

AZZ AZZ PR